

समे – 12:25

<><><><><><>

PM Reply In RS

प्रधानमंत्री नरेन्द्र मोदी होर संसद दे दौनें सदनें दी सांझी बैठक च राष्ट्रपति हुंदे अभिभाषण बारे धन्नबाद प्रस्ताह दा अज्ज राज्यसभा च परता देंगन। श्री मोदी होर अज्ज संजा राज्यसभा च अपना परता पेश करगन। संसदी मामले दे मंत्री किरन रिजिजू होरे सोशल मीडिया दी इक पोस्ट राएं एह जानकारी दित्ती ऐ। दऊं रोज पैहले लोकसभा नै राष्ट्रपति हुंदे अभिभाषण पर धन्नबाद प्रस्ताह गी स्वीकार कीता ऐ।

<><><><><><>

Arms Recovered

सुरक्षाबले कल बारामूला जिले दे उड़ी सेक्टर दे आंगनवथरी आले जंगली इलाके थमां थेआरे ते गोला बरूद दा जखीरा बरामद कीता। एह बरामदगी फौज ते जम्मू कश्मीर पुलिस आस्सेआ चलाए गेदे सांझे अभियान दरान कीती गई। इनें थेआरे गी इक कंबल च लपेटियै चीड़ दे इक खोखले दरख्त अंदर छपैलेआ गेदा हा। इंदे च 3 एके-47 रैफलां, एके दियां 11 मैगजानां, एके दे 292 राउंद, 1 यूबीजीएल, 9 यूबीजीएल ग्रनेड ते किश हथगोले शामिल न। पुलिस इस सरबंघै च मामला दर्ज करियै अगड़ी तफतीश शुरू करी दित्ती ऐ।

<><><><><><>

DC-Samba HADP

सांबा दे जिला विकास कमीशनर राजेश शर्मा होरे जिला प्रशासनिक परिसर च इक बैठक लाइयै राई-बाई खेत्तर दे पूरे पराते विकास सरबंघी कार्यक्रम एचएडीपी दी अमलावरी ते एहदे तैहत हासल प्रगति दा जायजा लैता। मुख्य कृषि अधिकारी मदन गोपाल सिंह होरे एचएडीपी पोर्टल दे राएं ऑनलाइन आवेदन करने आले संभावित लाभार्थीएं दी सूचि दी समीक्षा कीती गई ते उसी मुकददा रूप बी दित्ता गेआ। इस मौके बक्ख-बक्ख कार्यक्रम तैहत 704 मामले गी मंजूह दित्ती गई। जिला विकास कमीशनर होरे राई-बाई कन्नै जुड़े दे होरने खेत्तरें गी तगड़ा बनाने दे महत्व पर लोह पाई।

<><><><><><>

NBHM-Seminar

राई-बाई मैहकमे आस्सेआ साईसी ढंगै नै भौर पालन बारे दऊं दिनें दा इक सैमीनार कल्लै थमां बाबा जित्तो किसान केन्द्र च शुरू होआ। भौर पालन ते मखीर सरबंधी राश्ट्री मिशन दे बैनर हेठ आयोजित इस सैमीनार दा मकसद भौर पालन कन्नै जुड़े दे करसानें, नोजवानें, महिलाएं ते उद्यमिएं गी इस बवसाय दे फायदें बारे जागरूक बनाना ऐ। कृषि विभाग जम्मू दे डरैक्टर सरदार अरविंदर सिंह रीन होर उद्घाटनी समारोह दे मुख्ख परौहने हे। उनें खित्ते दे नोजवानें गी रोजगार दे मौके उपलब्ध करोआने ते बाद्धू औंदन हासल करने च भौर पालन दी महत्वपूर्ण भूमका उप्पर लोह पाई।

<><><><><><>

Maha Kumbh

प्रयागराज दे महाकुंभ च अज्ज जनजाति सांस्कृतिक संगम 2025 दा आयोजन कीता जाह्ग जेह्दे च मुख्ख भरै थमां 15 ज्हार शा मते जनजाति समुदाय दे लोक हिस्सा लैडन। स्हाड़े संवाददाता दी रिपोर्ट मूजब, 6एं दिनें दे इस कार्यक्रम दरान हर कोई, जनजातिय समुदाय दी संस्कृति ते परंपराएं दी राक्खी-हिफाजत दी सगंध चुक्की जाग। भगवान बिरसा मुंडा हुंदी 150मीं जयंती दे उपलक्ष्य च बरे 2025 गी जनजातीय गौरव वर्ष घोषित कीता गेदा ऐ।

<><><><><><>

SWD Camp

समाज कल्याण मैहकमे आस्सेआ कल पुंछ दे मंडी इलाके च उत्थूं दे दिवयांग जनें लेई इक कैंप लोआया गेआ जेह्दी अध्यक्षता एमएलए हवेली ऐजाज अहमद जान होरें कीती। इस मौके उनें अपने हल्का विकास फंड चा 10 लक्ख रपे मैहकमे गी इनें लोकें दी भलाई बेह्तरी लेई देने दी घोषणा कीती। कैंप दरान उनेंगी चलने च सखाल आलियां सोटियां, व्हील चेयरां, त्रै टैरें आलियां सैकलां, नकली लत्तां बावां ते सुनने च सखाल आलियां मशीनां बगैरा बी लोडमंदें गी दित्तियां गेइयां। जेह्दे लेई लोकें विधायक हुंदा ते मैहकमे दा आभार प्रगट कीता।

<><><><><><>

JKAACL Kala Kendra

संस्कृति मैहकमे दे कमिशनर सैक्रेटरी के. रमेश कुमार होरें कल कला केन्द्र जम्मू दे कम्मकाज दा जायजा लैता ते एह्दे कम्में—कार्रवाइएँ च बाददे दी जरूरतै पर जोर पाया। उनें आखेआ जे सांस्कृतिक विरासत गी बढ़ावा देने च कला केन्द्र गी उत्कृष्टता दा इक केन्द्र बनाने लेई सब्बै संभव संसाधनें दा उचित इस्तेमाल कीता जाहग। उनें सरबंधत अधिकारिएँ गी निर्देश दित्ते जे ओह् इस भेठा पूरी तनदेई कन्नै कम्म करन। इस मौके उप्पर उनें संस्थान दिऐं बक्ख—बक्ख गैलरिएँ दा निरीक्षण कीता ते जम्मू—कश्मीर दी बन्न—सबन्नी सांस्कृतिक विरासत दे प्रदर्शन च उत्थुं दे अमले ते कलाकारें दे निष्ठा दी सराहना कीती। एह्दे शा पैहले डाक्टर जावेद राही होरें संस्थान दे कम्मकाज दा ब्यौरा पेश कीता ते दस्सेआ जे पिच्छले बरें कला केन्द्र सोसायटी नै राश्ट्री ते अंतर्राश्ट्री सतह दे कार्यक्रमें सने 37 प्रदर्शिएँ ते कार्यशालाएँ दा आयोजन कीता ऐ।

<><><><><><>

Capex Budget Meet

जम्मू दे अतिरिक्त जिला विकास कमीशनर शेर सिंह होरें जिला कैपेक्स बजट तैहत जारी कम्में दी प्रगति दी समीक्षा लेई इक बैठक दी अध्यक्षता कीती, जेह्दे च मुख् तौरा पर पीएचई, सेहत, शिक्षा, सिंचाई ते हाइवे रोकथाम सरबन्धी मैहकमे दे कम्में पर चेचे तौरा पर गल्लबात कीती गेई। उनें सरबन्धत अफसरें गी निर्देश दित्ता जे कम्में दे मयार कन्नै बिजन कोई समझौता कीते दे, इन्दा तौले ते समें सिर मुकम्मल करना जकीनी बनाया जा।

<><><><><><>

KNVB Football

युवा सेवाएँ ते खेड्डें सरबन्धी मैहकमे दे मंत्री सतीश शर्मा होरें कल के.एन.वी.बी. डच फुटबाल एसोसिएशन दे इन्ट्रक्टरे कन्नै गल्लबात कीती करियै खित्ते च फुटबाल खेड्ड दे विकास आहली पैहलकदमिएँ पर चर्चा कीती। सतीश शर्मा होरें भलेआं हेठली सतह उप्पर फुटबाल खेड्ड गी बढ़ावा देने, महिलाएँ दी शमूलियत जकीनी बनाने ते इस खेड्ड दा दायरा ग्रामीण, जनजातीय ते बन्ने आहले ग्राएँ तोहड़ी बधाने दी सरकार दी वचनबद्धता गी पक्का कीता। इस पैहलकदमी दे तैहत, इस खेड्ड कन्नै जुड़े दे कोचें ते रैफरिएँ दी दक्षता बधाने आस्तै इक कोर्स दा आयोजन बी कीता जा करदा ऐ। मंत्री होरें आखेआ जे जम्मू—कश्मीर च युवा फुटबाल खड्डारिएँ लेई बेह्तरनीन मौके जकीनी बनाने लेई बवस्थित ढंग्गै नै सिखलाई

कार्यक्रमें दे आयोजन ते आलमी सतह उप्पर सांझ-भ्याली लेई सरकार अपना सैह्योग देना बरोबर जारी रक्खोग।

<><><><><><>